



COMISSÃO ANTI-CORRUPÇÃO



Komunikadu ba Imprensa

Numeru Konkorentes Eleitoral Bo'ot Maibe Vontade Politika?

Ba Publikasaun Imediata: 27 Feveireiru 2012

Dili, Timor – Leste— Numeru partidus politiku no kandidatus prezidensial bo'ot maibe vontade politika ba asuntu nebe sai prekusasaun nasional seidauk bo'ot hanesan—ne'e maka fenomena nebe akontese iha loron Sabadu 25 Feveireiru iha konferensia konjunta nebe CAC ho CNE organiza ba konkorentes eleitoral ba tinan 2012 konaba “Transparensia no Fiskalizasaun ba Kontas Eleitoral: Dalan atu Hado'ok Aan husi Korupsaun Eleitoral,” iha Sentru Konvensaun Dili, Caicoli, Dili. Oportunidade diak ba konkorentes eleitoral sira maibe ladun hetan interese no la aproveita didiak momentu ne'e. Partisipasaun husi partidus politiku sira minimu tebes, kandidatus prezidensial nian laiha ema ida maka marka prezensa, apenas representante ida rua husi sira nia ekipa suksesu deit.

Politiku na'in sira nebe marka prezensa ohin maka Prezidente Partidu Unidade Nasional (PUN) Fernanda Borges, representantes husi Partidu Opozisaun Fretilin, Partidu Frente Mudansa, Partidu Social Demokrata (PSD), Partidu Unidade Nasional de Rezistencia Timorensis (UNDERTIM), Partidu Dezenvolvimentu Nasional (PDN), Partidu Kmanek Haburas Unidade Nasional Timor-Oan (KHUNTO) no Partidu Liberta Povu Ai-Leba (PLPA). Konvidadus seluk nebe marka prezensa maka Sigundu-Komandante Polisia Nasional Timor-Leste Afonso de Jesus, representantes husi Misaun Nasoens Unidas (UNMIT), no Sosiedade Sivil.

Konferensia konjunta ne'e apresenta oradores na'in 5 mak: Juiz Tribunal Konstitusional Hamdan Zoelva husi Indonesia koalia konaba esperiensia Indonesia konaba korupsaun politika, Michael Maley husi Australia koalia konaba dezafius no oportunidades iha prosesu eleitoral, liu-liu konaba korupsaun politika nebe involve partidus politiku no kandidatu independente sira, Prezidente Tribunal Rekursu Claudio Ximenes koalia konaba perspektiva legal ba leis eleitoral nian, Komisariu CNE Faustino Cardoso Gomes koalia konaba apresiasaun no avaliensaun ba kontas partidus politiku sira no koligasaun partidus politiku sira no Komisariu Adjuntu CAC Manuel Bucar koalia konaba papel CAC iha prosesu eleitoral no deklarasaun riku-soi.

Diskusaun nebe maka mosu barak liu iha sesaun perguntas no resposta maka konaba mekanismu ba prosesu legal wainhira iha keizas ruma nebe iha relasaun ho korupsaun politika no mekanismu konaba deklarasaun riku-soi. Kuaze representantes partidu politiku nebe marka prezensa konkorda ho asuntu prekusasaun konaba reseitas estadu no oinsa tenki iha mekanismu ida atu kontrola rekursu estadu nian hodi uza ba prosesu eleitoral ba tinan 2012. Asuntu seluk nebe diskuti mak konaba subsidiari ba konkorentes eleitoral nian no nia mekanismu atu apresenta kontas ba CNE no oinsa deteta krimi eleitoral.